

ଓଡ଼ିଆ




આય રી'ત બદાહાં શરુઆત વયી. દે'વ છ દિહાંમ દુનિયા અન તિયામરો બદો ઉતપન્ન કયો.દે'વ જાંહાં પૃથ્વી ઉતપન્ન કયી તાંહાં તે અંદારાથી પોયની અન ખાલી અતી. આંયાં બિજો કાંય જ નતો પન દેવા આત્મા પાંયા ઊપ આન્તના.



તાંહાં દે'વ કયો, "ઉજાલો વ" અન ઉજાલો વયો. અન દે'વ તે ઉજાલો પાલ્યો કે તે હારો સય. અન તિયાન દિહ કયા. અન દે'વ તિયાન અંદારાથી સુરો પાળયો, અન તિયાન રાત કઈ. દેવ ઉતપન્ના પેલ્લ દિ'હ ઉજાલો બનાવ્યો.



ઉત્પન્ના બિજ દિ'હ દેવ બોન્યા અન તરતે ઉપ અંતરીક્ષ ઉત્પન કયો, તિય જુગાઈઆન ઉંપર પાંચાથી એઠર પાંચાથી અલગ કયો.



તેજ દિ'હ દેવ બોન્યા અન પાંચાન હુકી તરતેમથી અલગ કયો, તિય તે તરતેન પૃથ્વી કઈ અન પાંચાન દરિયા કયા, દેવ પાલ્યો કે તિય જી ઉત્પન ક્યો, તે હારો સય.



તાંચ ફસી દે'વ કયો, “તરતી ખળ, દાંણાવાલી શાકપાજી અને ફલ ઊગા'વય.” અને ઈહનોજ વયો. દે'વ પાલ્યો કે તિય જી ઉતપન્ન કય્હો તે હારો સય.



અને ઉતપન્ના ચોથા દિ'હ દેવ બોન્યા, અને સુરજ (દિહ), ચાંદા, અને તારે બનાવ્યે. એ હારૂ કે તે તરતે ઉપ ઉજાલો આપય, અને રાત અને દિહ અલગ પાળય. દેવ પાલ્યો કે તિય જી ઉતપન્ન કય્હો તે હારૂ સય.




પાચમ દિહ દેવ બોન્યા અન બદે જનાવરે જી પાંચામ તરતેહે તિહાંન બનાવ્યે,દેવ પાલ્યો કે તિય જી ઉતપન્ન કચ્છો તે હારો સય,અન દેવ તિયાન આશિર્વાદ આપ્યા.



ઉતપન્ના છઠ દિ'હ દે'વ કયો તરતી ઉપરે બદ પરકારા જનાવરે ઉપજાવા. અન દે'વ જેવ કયનો તે પરમાણ વયો. કથેક ગામા જનાવરે, કથેક ડેડે હરનારે અન કથેક જંગલી જનાવરે અતે અન દેવ પાલ્યો કે તે હારો સય.



અન દે'વ કયો આવા આપી પોતા સ્વરૂપ અન પોતા પ્રતિમા પરમાણ માહાંન બનાવજી. તે તરતે ઉપ અન બ'દ જનાવરહા ઉપ રાજ કય.



દે'વ થોળાક કાદુ નેદા અન તિયાન માહા રૂપમી આકાર આપ્યા. અન તિયામ તિય જીવના હાઅ કુક્યા. આય માંહા નામ આદમ અતો. દે'વ એદન વાળી બનાવી જાંચ આદમ રત શકય. અન તિયાન તે બદહા કાલજી નેના હાડુ મીક્યા.



વાળે વચ્ચ દે'વ બેન ખાસ સાળવે વાલ્યે, જીવના સાળવો અન હાસો ખોટો જાહના સાળવો. દે'વ આદમાન કયો કે તે વાળેમ'મરે બ'દ સાળવા ફલ ખાત શકહ ફક્ત હાસો ખોટો જાહના ફલ ખાના ની. પાલ તુ આય સાળવા ફળ ખાહ ત તું મહ.



તાંહાં દે'વ કયો, માહું એકના રય તે હારો નાહા. પન જનાવરહામથી કળુ બી આદમાન મદદ કનારો બનીત શક્યો ની.



ઈત દે'વ આદમાન ભર નીદેમ હુવાડયા, અન તિયા પાંસળે'મરી એક નેદી અન તિયા એક બચે બનાવી, અન તિયેન આદમા પાહ નેત આલા.



અન જાંહા આદમ તિયેન પાલી, તિય કયો છેન્ન આય એક મા જુહની સય. તિય તિયેન બચે કચી. કેવ કે તે ભાયળામથી નેના આલ્ની. એ હારૂ માંહું પોતા યાયસી બાયસાન સોળીત દેય અન તિયા નાડે હાતી બેનુ એક વય.



દે'વ ભાયબાન અન બચેન પોતા સ્વરૂપ પરમાણુ બનાવ્યો. તિય તિહાંન આશિર્વાદ આપ્યા અન કયો તુમ્હાન જબરે પયરે અન પયરા પયરે વ. અન આખી તરતેન પોત દિયા. અન દે'વ પાલ્યો કે તિય જી કાય ઉત્પન્ન કર્હો તે જબરો હારો અતો. અન તો જબરા ખૂશ વયા. આય બદો ઉત્પન્ના છ દિહામ બન્યો.



જાંહાં હાતમા દિહ આલા તાંહાં દે'વ તિયા કામ પુરું કયો. આય દિ'હ દે'વ તિયા બ'દ કામહામથી આરામ નેદા. તિય હાતમા દિ'હાંન આશિર્વાદ આપ્યા. અન તિયાન પવિત્ર ઠરાવ્યા. કેવ કે આય દિ'હ તિય તિયા બ'દ કામહામથી આરામ નેદા આય રીત દે'વ તરતી અન તિયામરો બદો ઉત્પન્ન કયો.